



责任审校 熊东遨

敖普安（5首）

齐白石故乡行

星塘晨兴

童心早岁羨雕龙，最爱丹青大匠风。
一曲新歌堪唱叹，星塘同醉晓霞红。

杏子坞

青山四面芰荷乡，长夏村居半日凉。
牛背夕阳红一角，晚炊烟散满林香。

甌屋旧事

灯盏无油苦学迟，廿年心事白云知。
最难风雨山窗下，松火荧荧夜读时。

杉溪

磨石书堂刻印成，长塘小立听蝉鸣。
山泉飞送隔宵雨，十里杉溪锦浪生。

茶恩寺

依路临溪屋数间，岳云来去客窗闲。
衡阳昨夜飞车过，惊觉羁人晓梦残。

胡静怡（5首）

大师五咏

陈寅恪

三户亡秦石敢当，九章哀郢字生光。
目盲足腴腰难折，宁颂烟花不颂唐。

叶企孙

先生噩梦醒来迟，西陆蝉声断续时。
幸剩残躯为乞丐，一从坑后再无师！

束星北

导弹飞行路八千，一番神算数张笺。
天才难度红羊劫，扫厕锥心二十年！

曾昭燏

金袂凌风绝世姿，曾家儿女不胜悲。
先人罪逼今人赎，跳塔犹嫌解脱迟。

林徽因

新贵门前辨是非，黛眉扬处自生威。
名花幸得霜前谢，未致残红带血飞。

熊治祁（5首）

读新旧《唐书》玄宗本纪

盛世开元载史篇，武功文治用忠贤。
焚珠毁绣倡敦俭，从谏如流二十年。

东岳封禅呼万岁，千秋节是朕生辰。
德消政易多朋党，贼子奸邪作宠臣。

骊山歌舞醉升平，社稷从兹祸患生。
大厦将倾浑不觉，美人娇媚浴华清。

渔阳鞞鼓催西幸，赐死杨妃泪不收。
逊位责躬殊已晚，低吟傀儡万重愁。^①

后人千载说明皇，英主如何毁盛唐。
奢靡昏庸无止境，焉能落得好收场。

注：①《全唐诗》卷三录有唐玄宗《傀儡吟》：“刻木牵丝作老翁，鸡皮鹤发与真同。须臾弄罢寂无事，还似人生一梦中。”传为玄宗晚年被幽禁西内时所咏。

陈书良（5首）

游韶关忆四十年前易新夏教授殷殷相待

四十年前老相如，小窗灯火屡谈诗。
而今君作稽山土，还证重来挂剑知。

南华寺

六祖当年困贱儿，心旌高论谔燃犀。
如何暮雨子规里，下下沉沦上上迷。

步韵治祁兄八十初度二绝

文章始信寿弥工，斗酒群雄辞不穷。
忆昔识荆尘满面，试场搁笔笑鸡虫。

时宜难合马牛风，闻道长安世说中。
柳绿桃红浑不管，春光荏苒属诗翁。

烈士陵园赏荷此地四十年前为余工余休憩地也

荷塘应在小堤东，掷笔当年卧好风。
几尾老鱼吹细浪，摇开绿绮现妖红。

熊东遨（5首）

春日故园访旧

家山逢旧侣，快爽不须猜。
意钓临江曲，神聊坐井台。
乱流终日对，孤抱一时开。
失去童年影，犹能驭梦来。

雨中登新化罩金岩展亡友汪良忠博士墓

尘劳除已尽，归卧在云冈。
献享山梨白，留根穴草黄。
几番来梦寐，终是隔阴阳。
往事频翻起，天涯独感伤。

滇桂道中

驱车百里探边庭，次第峰峦扑眼青。
莺雀唱酬多异曲，水云来去不同形。
奇观已作寻常看，野语何妨自在听。
卅五年过谁复想，有人埋骨在松屏。

中国人民政治协商会议成立七十五周年

七五年光顷刻移，东风于我不相欺。
浪奔江海声尤壮，云附峰峦势转奇。
人以诤言为药石，国凭法制固根基。
九州生气从今始，百丈材高与世宜。

夏夜游慈恩寺望大雁塔

孤高出层霄，流转光欲泄。
池水相涵容，疏星自明灭。
还将极顶云，认作终南雪。
未步唐贤登，仰怀其在列。

覃明德（5首）

感梦呈老作家谭士珍

怀化十年甘折腾，先生未老我年轻。
旗扛文学尊弘业，眼藐金钱作准绳。
授课开坛人聚累，挑灯撰稿笔枯灵。
争多奖项不争职，回首方知一梦撑。

参加村葬书感

小松岗上纸钱飞，唢呐声哀爆竹悲。
黄土掘坑能掩骨，白云裁片可镌碑？
龄齐松石摧生趣，命共穰稂绝妄为。
此后尘缘如未尽，仙窗俯看卷珠帏。

题自作山水画

一壑俗尘无，笔端由此殊？
泼狂群岫湿，写逸几松枯。
远水来鸣石，稠云去吞庐。
倩谁座上叹，楚地见斯图。

清理手机已故联系人寓叹

往岁拂尘埃，故人一一来。
衣冠色不改，腔调土能猜。
谈笑风生座，送亡花棘怀。
人间多少事，未绝是欢哀。

枕上偶梦学车醒后戏作

恍若响辘辘，窗添夜雨频。
难寻断后梦，已是老来身。

能饭常辞饱，无车半为贫。
难忘交警说，事故总惊人。

谭秉炎（5首）

磨镜台观云海

茫茫白浪涌禅台，久雨初晴暮色开。
遥望祝融生胜景，流云如瀑过山来。

麻姑仙境

曲径沿溪入洞天，潭清林茂响飞泉。
水边松下神龟石，曾见何时海变田？

南台寺

数里浓荫道，悠然信步游。
乱流鸣翠谷，野卉艳清秋。
礼佛大雄殿，饮茶方丈楼。
留连归去晚，山色已暝幽。

十方紫盖寺二首

闻响入林寒，流泉溅石湍。

人稀苔径滑，木古老根蟠。
摘果童攀树，修行僧闭关。
寺门空寂寂，斜日照幽山。

深山古刹隐林丛，迢递钟声度晚风。
银杏满阶空自落，寺门长锁白云中。

吕可夫（5首）

甲辰春节前夕摔跤致右肩胛骨折

虽只伤肩胛，半身无自由。
穿衣须借手，起榻赖扶头。
鸟乐徒观跳，鱼欢空羡游。
悔忘行路险，一步失荆州。

甲辰谷雨

杜宇催忙春暮天，茶蘼簇锦柳飞烟。
乡村四月人无几，鹭戏青芜白水田。

甲辰端午

同日投江伍屈曹，缘何只祭楚离骚？
无非历代君王故，一点愚忠屡拔高。

故园之夜

叠瓦丛墙院落幽，朦胧月色满庭秋。
鬓黄不解蝉蛩怨，鬓白方知桑梓愁。
蓬转萍飘思立足，山穷水尽剩挠头。
欲归唯有碎砖砾，竹马春蚕一梦休。

应三石先生邀约乡间别墅珠林小筑雅集

垄畴山野望中收，归去来兮隐小楼。
庐柳虽无陶宅密，庭梅却有陆林幽。
雨临古帖蘸青写，晴看闲云簇白流。
自叹萍飘根逐水，退居难觅寄身丘。

楚石（5首）

湘江春晓

薄雾如纱初日晴，烟笼江岸晓风清。
白沙滩上莺啼早，金水湾中燕舞轻。

古寺钟声穿暖树，扁舟云霭下潭城。
我怜春色空蒙好，疑是天阶月殿行。

湘江秋月

迢迢银汉正更残，万里长空转玉盘。
月落江心湘水远，风生山脊楚天寒。
桂香微暖人初静，竹影轻摇露未干。
难费丹青传此意，最宜诗酒酌雕栏，

湘江怀古

文山载酒曲江游，杜子庆霞停晚舟。
僧老不知刘太尉，义高始识古桑洲。
空灵寺内怀梅影，分袂亭前忆唱酬。
昔往今来多少事，都从兴替看沉浮。

春游婆仙岭金轮古寺初识叶舟和尚品茗于禅房

春日寻芳松影斜，婆仙望尽是田家。
狂蜂声压含苞蕾，浪蝶闲偷无主花。
杨柳因风飞翠玉，杜鹃滴血吐红霞。
白云古寺游人少，聊与山僧论煮茶。

石鼓书院远眺有怀

青草桥边柳色残，登临远眺独倚栏。
蒸湘细浪合江阔，烟雨扁舟分水寒。
千载学庭今又在，百年人物古来难。
再腾龙虎开书帙，不尽波涛涌翠澜。

陈樵哥（5首）

同湘馆诸老观南岳摩崖《还丹赋》

山人为示摩崖碑，一石高广六丈围。
文字漫漶苔四垂，用笔庄重收奇瑰。
观之抚之动双眉，恍见蟠螭与伏龟。
忆昔大禹驻旌麾，金简玉书赐挈维。
何人发秘慎勿悲，运逢唐宋知者谁。
众药之宗丹道岩，朱汞黄芽达天逵。
大功莫测不可追，大道虽彰不可窥。
张家仙翁辞不卑，唐公从善写如锥。
其文其刻风雨吹，向此弥陀一径危。
诸老博学天下推，以趣约易如折葵。
指认古事肃无亏，授持玄灵福以绥。
对此正好为吾规，莫怪终日声唯唯。

读《四时吟韵》赠宗兄天雄四首

相思湖畔听莺啼，咏月吟风对柳堤。
一曲南坡春讯早，无言桃李自成蹊。

人物鸡虫尽入歌，江洲野谷秀青萝。
弄潮时尚随心写，夏日长风抚芰荷。

重阳题就菊花香，鸿雁传声过客堂。
群座灵犀通一点，登高携酒共挥觞。

雪裹琼枝日照迟，断桥水岸守清姿。
心香只肯松篁共，半隐生涯酒与诗。

石印文（4首）

参加湖南省公安厅文化下基层活动与书法同仁至

石门县壶瓶山镇晨起口占

又宿壶瓶镇，谁知已暮秋。
临寒花独艳，照影水长流。
街古民风旧，茶香岸树稠。
参差群籁处，人在画中留。

甲辰迎春曲

冻雨逢春入甲辰，万山银饰绝纤尘。
花飞六出年称瑞，诗及三农韵最真。
敢放沧桑临酒席，惯将祝贺转亲邻。
兔毫造福平生愿，笔下龙来一派新。

桃江一中建校八十周年诗友邀约参观因事未与感而成此

映雪曾怜困顿身，隔屏遥羨满园春。
已慳数仞宫墙约，未脱长年文字贫。
台上凤凰原有种，山间铃铎更迎宾。
且看翠海奔腾浪，万本龙孙逐日新。

题金家堤村笛渔桥兼怀金家堤党支部创建人欧阳笛渔

长渠清畅景葳蕤，虹影摇波柳拂陂。
花树相宜缘物化，禽鱼自得是人为。
当时蓄志能题柱，此地怀君尚有碑。
且向新村抬望眼，百年魂梦系于斯。

张建明（4首）

雨后登七星岭

穿行重帐又轻纱，小作神仙影半斜。
山鬼不迎曾约处，层岚变幻雾中花。

龙园品茶并问艺兰之疑

龙园竹露共兰生，细检陈团带笑烹。
腕底心清流琥珀，坐中疑散转晴明。
人因近性言无碍，事涉真情趣自成。
得意不知茶味老，漫将新唱和瑶箏。

秋夜过汨罗江望月

昔日今宵月，清辉抚激流。
才消寒橘恨，又起浣花忧。
露冷凝高洁，云孤忆旧游。
江莲添凤眼，默默送行舟。

步韵意坚道兄岳麓印社落户岳麓山一周年庆

春盛百花妍，居山小一年。
闲云舒缱绻，古印作绵延。

凿刻朱侵白，修为博后专。
因时欣纵笔，岳麓动风烟。

罗冈（4首）

友人赠笔口占

馈我生花笔，吟边逐梦飞。
指中奇力出，字里见光辉。

癸卯腊月易青女史招饮窑醴谣山舍

农舍来听自在谣，敛襟谈老慕渔樵。
盘飧野藿知甘味，坐对青山酒一瓢。

疫中口占

回寅斗柄已朝东，疠疫三年在梦中。
一捅深知屏要绿，十分害怕码通红。
余生强学袁安卧，不死高吟太白雄。
豆腐笺铺挥秃笔，只求神似懒求工。

癸卯大雪前一日偕红卫小学诗联社诸友访岳麓印社

结伴同行岳麓山，为探幽境偕来攀。

林中印社安然矗，亭外云松耐得闲。
滴血群枫皆入眼，经霜片叶足怡颜。
冬阳半缕人心暖，坐对茶烟不忍还。

谢宏治（4首）

南岳衡山

千寻衡岳峙南天，七二奇峰烟雨绵。
朝看白龙飞瀑布，暮听朱凤唱云端。
春风一拂琼林秀，皓月初升玉镜圆。
道道溪声留古韵，传经护法意超然。

水帘洞

一道飞流寄彩虹，九天降下玉帘栊。
青鸾镜里晴雷响，朱凤屏中夏雪蒙。
坐看春风开树影，闲移秋月照花丛。
欲邀仙子拾空翠，喷日穿云客梦同。

悟南岳禅

夜半松风入画屏，庭前坐看老人星。
空山寂寞蝉无语，云在青天水在瓶。

咏南岳云

朵朵芙蓉拱祝融，耸岩泻壑画图雄。
势腾万里奔沧海，形隐群山漫碧空。
玉宇依然仙女舞，瑶池倏尔白驹冲。
花飞何处无边际，不尽柔情今古同。

周永红（4首）

谒朱陵宫

檐牙高啄挂疏钟，宫观千年荫古松。
入望白云浮紫盖，山中恍见老犹龙。

宿盘石洲同开福寺碧湖诗社采风诸子

幕阜天帷绚烂开，仙抛玉带下凡来。
淡妆雾鬓穿花树，净洗尘襟出草莱。
半岛移时生蜃市，空门随处幻莲台。
且将盘石残云扫，好与头陀细嚼梅。

观磨砖作镜佛教艺术展

唐烟宋雨几烽尘，石虎铜驼漶漫身。
杖钵千年踪去远，输觚数点迹存真。

何如碧浪吟三叠，绝似清波放一纶。
洗砚磨砖禅顿悟，镜花水月认前因。

观贤人居为开福寺五百罗汉阴沉木造像

乱离骨肉死灰心，亿万斯年共陆沉。
早许栋梁撑梵宇，终将胎魄化禅林。
持身五百庄严显，具足三千智慧临。
会向碧湖观自在，紫微深处听潮音。

杨立新（4首）

清 供

踏春折得一枝回，闲插青瓶供案台。
清露从今应惜取，满山风雨不重来。

云栖竹径

亭阁烟生竹露清，乳鸠出谷一时鸣。
山中不觉风花落，满径青苔屐印轻。

端午有感

角黍青青艾草香，一年容易又端阳。

惭无肝胆蹈沧海，独剩文章祭国殇。
日月不言因德厚，江山有恙在心凉。
白头重作招魂赋，只合微吟替慨慷。

林昭次昨夜兄韵

苏州城外葬孤魂，四十年来血尚温。
一死无非酬看客，此生何幸领天恩。
经春草木惜花雨，隔代江山轻泪痕。
咫尺风流埋骨处，至今蝶过避香盆。

曹春华（4首）

立冬日种花

令到冬时趁快晴，晨光曳梦梦痕轻。
谁怜静室无邻鹤，心羨东篱有菊英。
旧雨每期云外信，灵眸已倦眼中青。
持锄漫把根苗种，只种清欢不种情。

看店

照花人面已非初，静守清欢待酒沽。
翠羽莺哥添婉转，黄金贡焙继琼腴。

饮将欢伯三千盏，数得春芳第几株。
诗债何妨身负满，笑看陈酿醉眉须。

偶 感

人生当惜好年华，安得此心即是家。
别样芙蓉终不染，天然石玉岂无瑕。
淡看世事欣逢月，浣洗襟怀时见花。
抱揽清欢忘物我，休将空盏负流霞。

外卖跑腿翁

夜色茫茫灯影垂，饥肠辘辘饭来时。
菜温犹惜须眉老，汤满谁怜步履疲。
唯羨荔枝呈妃笑，恐评差语谓吾迟。
翁担风雨余供职，皆是人间父与儿。

巴晓芳（4首）

宜昌大撤退纪念碑

远去烽烟数十秋，长江西望水悠悠。
一锚勾忆当时事，几笔书回故国愁。

冒死船工拼热血，逃生火种赖方舟。
滩头略有宽余地，可与卢公寸影留？

春日过神农架遇雪

村里桃花方灿然，转身白雪满高山。
枯枝断处千峰寂，野草埋时五夜阑。
险尽何妨添险路，春归却怕倒春寒。
巴云秦树遥相望，多少行人马不前。

甲辰初春夜宿西陵峡

风轻雾薄晚霞明，时有春花夹道迎。
巫峡峰高存旧梦，西陵酒暖歇征程。
便邀渔火两三点，好伴荒灯四五更。
休叹云山皆暗寂，一天星斗尚纵横。

吊焦山古炮台遗址

秋风落叶雨潇潇，吹打江东旧战壕。
似诉南京签盟约，难焚西舰哭江潮。
焦山几度成焦土，碧血曾经洒碧霄。
纵使如今非锁钥，还须浩气鼓征袍。

蔡聪（4首）

深夜闻香

昏灯栅外影幢幢，三月穿衣炎转凉。
未忍踏春春自过，雨声敲落柚花香。

光阴过隙

莎叶披离杂冷香，迟来抑或契初偿。
湘江水缓映天阔，笔帖式微知夜长。
三十从龙孤影瘦，万人如海一身藏。
低徊静思瞻云路，风扫溶溶白月光。

端 阳

蒲叶萋萋湘水哀，客袍慵卸采楮回。
有时俗事难为罢，无意清风久候来。
纸上宫商歌小玉，卢前诗笔向瑶台。
三年大疫奢康健，聊遣碧筒长引杯。

书 房

小写前人两卷经，南窗寄傲却劳形。
赏瓶斜插田田叶，簌竹低垂个个青。

磨砚何堪天下溺，散怀绝少眼中钉。
娶红妃白一枚印，眯眼看来醉复醒。

曾爱明（4首）

夏日书事

翠叶闲看带雨新，园中爬蔓渐欺邻。
蚁虫更早知瓜熟，坐享清甜不待人。

闻故人抵长安

君入三秦我在湘，几回河岳壮诗行。
坐看兵俑能怀古，行到峰巅可望乡。
已恨有才多禁锢，也知无酒不痴狂。
隔空谁会登临意？城阙新修掩破亡。

为睡莲换盆记

几历寒潮唤未醒，不知风暖近门庭。
翻盆尽摘根须黑，换水期回叶底青。
的皪生涯原有梦，至纯君子岂无灵。
梅花已隔春秋远，昵语还凭竹外听。

回 乡

九湾西下正当门，陈酿谁家酩满樽？
鸟出樊笼天阔大，人归乡井地温存。
风云毕竟为山阻，琐碎何如对母论。
树掩沙洲多旧识，几回光影错晨昏。

邓杰（4首）

不 响

一镜摇回三十年，黄河路口暮如烟。
风来海上春江暖，人弄潮头片影悬。
异彩流光真似梦，深灯枯坐独难眠。
繁花落尽无声响，雾里寒冬夜半天。

入 伏

会饮京西六月天，羊头依旧挂楼前。
新闻九夏重开放，故榻长安独自眠。
蝉咽华容哀响杳，饵烹大国小鱼鲜。
炎蒸楚泽方初伏，野径风来不乱传。

春 暮

独向空凉坐，风来竹影斜。
苍青初过雨，苔老暗生花。
扫榻时宜躺，忘机饭可加。
门闲春欲晚，小火试新茶。

六月初七会饮沔上得“船”字

江畔清风起，社翁呼上船。
暂抛诗外事，来结酒中缘。
浮白花飞令，含青水带烟。
红云生笑颊，远树响鸣蝉。

段永松（3首）

中秋望月思母

去岁中秋夜，犹承膝下欢。
阖家尝月饼，扶母望银盘。
嬉笑忘年迈，平常话福安。
虽无珍饈具，共此乐团圆。
今岁中秋又，一轮唯独看。
倚门慈母去，回首故园残。

黄土笼新草，青丝恨野干。
只余清澹月，空照晚来寒。

访屈原区农科中心有感

一眼平畴玉砌成，从横万顷尽桑耕。
昔年卑湿今无迹，此刻肥饶独著名。
时有天鹅归水府，早无苛政苦苍生。
屈原回日应难识，家国迁更久太平。

题益阳清溪村

乡国无时不是春，溪声山色总良辰。
年逢税役今成古，世际丰穰梦作真。
益水能延王谢客，播茶自乐晋秦人。
相从思脱衣冠去，来逐田原事事新。

范义坤（4首）

王子山麓星湖半岛小住

岚开何必话峻嶒，雨后波光暑气澄。
养性问陶元有寄，摘毫厚味总无能。

一湾霞映星湖美，几处鸥盟霁日升。
南望珠江飘似带，云舒云卷已千层。

崖门炮台怀古

崖门凭吊冷风侵，血雨当年恸客心。
宋鼎悲同黄屋没，中华恨共碧云深。
至今虎豹魂犹凛，已去忠良气未沉。
几点红棉枝上发，凄清故垒起长吟。

观微信通讯录感题

淡然一笑待何如，数过千人气自舒。
有酒偏愁肥与病，无朋宁悦砚和书。
删存窗外芝兰茂，退隐湖边鸥鹭徐。
弹指荣枯天亦老，尘间攘攘有乘除。

云帆诗友会共青城工作室落成有贺

共青往事未如烟，新馆吟风夜不眠。
裁剪匡庐飞瀑秀，点妆田野露华鲜。
琵琶千载余悲喜，诗赋今朝有后先。
九派从容观去翼，云帆前路正无边。

关波涛（4首）

酬漂哥自溱浦携酒相赠

胜友贻佳酿，情如沅水长。
一杯金枣酒，千里共清香。

缅怀唐天际将军

救国为民生，将军百虑萦。
三枪夺攸县，万里事长征。
治水恩情厚，挥毫肝胆倾。
初心天地鉴，千载仰英名。

南天湖赏梅

神象山前拥旆旌，横斜恍入亚夫营。
风波海上何曾惧，百万梅花尽老兵。

仙湖茶

仙湖山顶品仙茶，香滑甘纯众口夸。
绿美东源千顷树，风清上莞小康家。
诗题兰雪多幽意，碗转乾坤惜物华。
唱响振兴三部曲，青云事业向天涯。

胡晖（4首）

青舍三居

闹市久蜗居，山野觅清渠。
相邀宜同道，如约到村墟。
爱坐幽篁里，梅开一两株。
香随云影下，花依林壑疏。
落叶松还软，流泉细亦徐。
东家鸡汤熟，隔篱将客呼。
场圃摆宽几，杯盏并矮壶。
火锅红且旺，园蔬青未除。
犹道天晴久，客当今岁殊。
新修村道后，三径若通衢。
时下深闺里，网邻德不孤。

初冬浏阳河

应信江南水未寒，双凫闲戏两相欢。
顽童追到芦花里，撒野犬儿呼不还。

听二胡《赛马》用韵“有”

此曲未曾闻，乍疑天上有。
松涛月出前，竹籁冰消后。
万马骤扬蹄，一弓轻在手。
醉中宜赋诗，当遇谪仙友。

访天问阁遗址

甲辰春分前日，与诗友于桃江资水岸边访天问阁遗址，言三闾大夫曾滩前垂钓，《天问》亦写于此。如今阁已不存，唯立小碑一块于不经眼处。

郊野萋萋青未迟，一年一度发参差。
荣枯当识穷通后，屈曲犹逢涨落时。
却道回旋此宜钓，何堪浩渺斗长移。
桃花流水本多恨，空阁新埋草里碑。

黄波（4首）

至龙田镇

一路叮咚听水流，满山青翠养双眸。
母鸡带崽钻鸢尾，腊肉将鲜与葛头。

花木向阳随意长，游蜂率性任花留。
手摸古树悠然叹，八百多年享自由。

读词偶感

漫漫此征途，相逢便不孤。
君才追定国，吾意比柔奴。
牵手迷阡陌，悬壶济五湖。
回眸情起处，天地亦虚无。

贺熊治祁老再收高足

不惧泥沙共，先生仍至清。
诗书传俊杰，道德赋忠诚。
人醉风同醉，师名徒亦名。
雪花知我意，持续献晶莹。

恼

调皮红豆闹丫枝，双鸽无聊正撒痴。
宣纸铺开来习字，点横撇捺也相思。

黄初（4首）

春日踏青

青溪水暖燕翩翩，野草花开碧柳前。
黄发垂髻翘首望，手中一线入云天。

思乡

客舍长沙已十霜，家山万里路茫茫。
登高怅望东流水，却寄乡思雁一行。

游洞庭湖兼示岳阳诸君

洞庭日夜流，浪白舞沙鸥。
放眼乾坤大，经风草木幽。
巴陵谪仙酒，梦泽少陵舟。
多少天涯客，匆匆一叶秋。

春日郊原摘菜

城郊野地辟春园，畦绿花红逐鸟喧。
老树枯枝权作担，一肩风月入黄昏。

黄去非（4首）

癸卯中秋前一日与诗友同过汨罗古仑女子桥

欣逢气爽秋高日，来向前贤一折腰。
驿道难寻桥尚在，沧桑屡换事何遥。
长藤落落飞青瀑，大木森森映碧霄。
流水无言人迹少，待谁相与话渔樵。

生日自遣

岁月消磨又一年，寒窗枯坐百情牵。
茫茫风雪途多困，草草生涯眼易穿。
慈爱双亲踪迹杳，荒疏三径梦魂连。
即逢初度难云乐，送旧惟堪对酒筵。

甲辰二月初八与同事雨中游青山岛

频年魂梦绕青山，乘兴来消半日闲。
细雨霏微春尚嫩，远天昏暗浪重环。
田荒不碍黄花发，事久难寻碧血殷。
幸赖主人村酒好，何妨沉醉破朱颜。

彭蠡古意

江流浩浩独朝东，水国茫茫势万重。
自昔嘉名归禹贡，至今胜概壮尧封。
石钟曾驻大苏迹，彭泽长怀元亮踪。
毕竟文人真不朽，凭栏凝望起幽悰。

蒋昌典（4首）

风 箏

得意云中走，飘然如醉酒。
浑忘自在身，牵在他人手。

忆初中走读母为晨炊

鸡叫娘先起，砂锅灶上温。
备炊人去远，儿亦事儿孙。

异 梦

夜来异梦生，孤立青云上。
回首不堪看，红尘深万丈。

春雨瘦西湖

舫泛波心眼欲迷，空蒙但觉雨中奇。
东君也惜西湖瘦，一夕轻霖小涨肥。

蓝衣（4首）

看梅四首

暗香依旧透黄昏，落落疏枝着藓痕。
三载不来同索寞，漫消风雨感天恩。

一树横斜倚石矶，风摇蜂戏颤巍巍。
客云亦减多情味，空惹寒香上素衣。

水色山光太久违，疏枝况且沐斜晖。
可怜爱极清滋味，怅带一身花影归。

红云一抹落青岑，石径幽幽草木深。
衣满烟埃霜满鬓，如何不死探春心。

雷凡（4首）

村 居

山静尘嚣远，晴风拂我家。
簞枝鸣紫鹊，篱落见黄瓜。
早钓南池鲫，闲浇北苑花。
故乡如此好，何必向天涯。

游千龙湖山庄

绿肥春渐远，细雨助闲游。
曲径延青石，平湖起白鸥。
已知天命久，不作稻粮谋。
但得水山乐，余生何复求。

赏 梅

信是梅当放，孤行至渚前。
寒中花一色，树底雪三千。
枝动暗香远，禽窥素艳怜。
何须长弄笛，高洁已昭然。

过大沕云墅

欲识初秋丽，随人层岭游。
四围扑苍翠，一屋卧清幽。
佐酒凭山味，听泉去客愁。
晚钟何处响，云树自悠悠。

李春梅（4首）

访卓然村原乡染坊

遗业重光有大观，掇蓝本色自天然。
原乡烟雨朝还暮，已染春山数幅宽。

过王震故居

犁剑江湖故事长，春风每忆课农桑。
乡关又报将军令，一夜花黄北盛仓。

过岳阳楼

昔种甘棠大荫留，谁言民瘼等浮沬。
一从忧乐分先后，长使官家重岳州。

过六如亭值华南风雨季

湖山旧迹入奇传，不合时宜豁眼看。
为吊多情风有信，落花犹作晚春天。

李意坚（4首）

访惠州东坡旧居

谪迁踪迹认存留，旧筑山边俯大流。
翟舍林家还古貌，松风竹影继前幽。
飘蓬事业乌台起，冷宦生涯白发休。
鸿爪来寻南岭外，春深地湿密云浮。

游粤东宿巽寮湾

轻车行色雨频悬，新旅暂安粤海边。
数日阴沉云压顶，一湾风盛浪连天。
栖能养静鱼龙渺，出少逢人浦屿偏。
已惯尘羁聊自脱，岭南放旷效苏仙。

巽寮湾与宗义兄、沧海兄晓行

粤天云阵布，海溼与相偕。
沙软行留迹，涛奔水湿鞋。

楼台依近岭，芦荻盛空崖。
昨蹶黄昏石，潮回已半埋。

访张谷英村

群山拱列翠环村，入户溪声出石根。
一姓瓜绵家世在，千檐鳞次古风存。
远迁板荡民无主，相继书犁室有痕。
六百年间遗大宅，青梅时节叩重门。

刘建中（4首）

立 春

天风似带一丝柔，云气南来转眼收。
草色羞羞应躁动，莺声切切有来由。
自然从美皆因顺，生性通情哪得愁。
向暖意随诗兴起，春闻山水迓悠游。

人在旅途

轮上阴晴总畏多，人生往返奈如何。
心依向处抛忧虑，事在明天懒琢磨。

一片云光诗绪踊，半壶村酒寂寥过。
闲来偶有平凡句，自拟情怀放胆歌。

油茶花

开在秋冬白，丛丛沟岭深。
清香随我入，甜味有蜂寻。
不羨趋时景，长留孕子心。
名非油贵出，美誉任谁吟。

祖塔老龙潭寻访齐己遗踪

一潭深绿锁，涛响溢清流。
岭树层层拥，山腰慢慢游。
早闻情不俗，曾识笔安休。
便老归何处，乡途百里秋。

刘杰（3首）

又过泂山密印寺

古寺深山里，仰泂今又过。
洗尘消溽暑，炊黍待南柯。

樵路诸天远，莲池万象多。
此身元自错，无语问维摩。

醴陵瞻耿传公祠怀耿飏部长

崇祠穆穆倚巉岩，堂号扶风总不凡。
为息烽烟光赤县，敢凭铁甲换青衫。
五年奉使能持节，百战将军未授衔。
永固金瓯思大德，梁间燕子久呢喃。

登羞女山

乐饮生涯暂乐山，先从梓里借萧闲。
来登绝顶云千叠，看取平畴水一湾。
亭上元无贤太守，身边幸有旧荆班。
春声到处难寻觅，留在溪桥不忍删。

刘正奇（3首）

山中客至

青衫笠影白云皴，物外终为自在身。
陆羽经中论色味，山僧也作叩门人。

生 计

碧梧栖凤岭栖霞，万类霜天馈物华。
雏菊欲香非苟且，竹篱生计半篮瓜。

出 关

久疏战阵避山阳，五岭松风带月凉。
为续人间烟火气，山阳暂别赴平阳。

罗伟雄（4首）

月 夜

簪花衣锦费绸缪，良夜同行意转幽。
却笑破空来皓月，不如侧面睐明眸。

全红婵

九年危立堪夸胆，十米翻飞最赏心。
未有水花同水响，凭空掷下一枚针。

收中南校友会短信问候

点检生平事亦艰，可堪问讯到壶边。
一声大笑嘲沧海，百侣重游羨少年。

得意已非新月句，出神仍忆艳阳天。
遥知岳麓漫山雪，却向寒窗几默然。

星城聚饮分韵得“三”字

欲叙前盟已不堪，戏言捷径弃终南。
开门事务得其六，鼓掌时长数至三。
渐可牢骚如酒意，强提逸兴助诗谈。
此来偶作兰亭想，那有风流供一酣。

罗忠诚（3首）

甲寅夜由黔赴粤晨起至海陵后即返湘

夜别黔山月半轮，去留无意海陵春。
漫夸浮世忧成乐，犹幸流年旧换新。
驿路堪怜朝暮客，烽烟难断古今尘。
不愁羁旅飘零久，却向潇湘寄梦频。

访时务学堂旧址步韵寒烟

南开五岭北幽州，盛世新风始此楼。
非是山川供远目，何曾岁月老征裘。
堂中笔力龙文鼎，座上茶香兔褐瓯。

长羨当年君子意，总将时务问清流。

辛未日返常宁看望父母夜不能寐

返乡百念不如灰，自愧躬身旦夕陪。
霜起犹怜萱草老，愁生只觉鬓颜摧。
曾将悯默诗千首，但慰飘零酒一杯。
今夜谁知游子意，西窗明月久徘徊。

田翔玲（4首）

农 妇

流光不尽鬓边华，依旧寒酸那个家。
新馆菊丛香几朵，问郎是否好看些。

压岁钱

结彩张灯又过年，围炉向火品时鲜。
猴精半倚阿姑侧，讨要新春压岁钱。

登天心阁

凌空高阁壮潭州，一带萦回紫气浮。
四面云山来眼底，万家烟火暖心头。

贾郎才笔江湖老，屈子文章社稷忧。
击水中流君记否，布衣寒士傲王侯。

咏 梅

应是东君巧手裁，月中仙子下瑶台。
一身孤峭迎霜早，万树清新浴雪开。
香骨何曾随世俗，冰心不染笑尘埃。
人间自有知音在，欲共春风入韵来。

肖志国（4首）

看龙舟

又逢五月艾飘香，十里人潮十里狂。
竞罢归来扶绿水，红裙争看彩船郎。

咏 松

云壑萧然已自高，孤生谁拟困蓬蒿。
不知幽愤何由积，时向空山作怒涛。

游洋沙湖

倦鸟行经久，来寻物外机。

清波衔素月，远树共芳菲。
人聚板桥荡，巷深灯影围。
杜公垂钓处，抱醉带诗归。

中秋怀舍弟

洞庭烟水自茫茫，有弟分襟隔五羊。
明月一天圆此夜，秋风万里独他乡。
鸣蛙不厌山塘窄，归雁何嫌云路长。
久备两坛村酿酒，可怜无梦到潇湘。

谢子中（4首）

花明诗社甲辰雅集于古韵艺术馆谢主人兼诸诗友

诗朋寻古韵，花气挤轩窗。
未教风来助，分明室已香。
笙歌能就酒，梅李最先尝。
雅事今成稷，凭楼和此章。

甲辰伏前聚花之林分得“酒”字

才吹汾水风，又饮诗家酒。
客自八方来，筵随圆席走。

官家解令牌，大众缄其口。
醒醉各西东，相期重剪韭。

甲辰春日访沕山茶场

游山车复转，及顶眼先忙。
四面峰峦叠，千层树色苍。
鸟啼云影外，心爱自由乡。
饮别茶园主，归来满腹香。

益修堂雅聚用“友”字

南国朔风来，梅花传信否。
沕滨递暗香，堂上开陈酒。
酒里出真情，炉边围旧友。
三巡未解饒，尽饮须持手。
世道莫言艰，人生翻作苟。
愁霜染青发，夜雪披春首。
枰局休乱猜，仙樵知没有。
蜀山妖与蛇，河洛旦遮丑。
戏好似糊涂，躺平想清楚。
昔年苦若加，来日龙将抖。
沉醉复循环，踉跄朝哪走。

赵海燕（4首）

甲辰端月访汨罗屈子祠恰逢祭屈大典

未惊烟鹭立青遥，来拜灵均魂欲招。
和磬舞雩尘世浊，扼云骚倡瑾瑜骄。
千年一跃哀孤勇，九域同声颂舜韶。
只带芷香裙角去，兴秦亡楚事沉销。

访左太傅祠

百里逶迤谒左君，没肩幽草掩残门。
垣如世蹇徒斑驳，楼与心空俱泪痕。
生死有天功或过，江山无定合还分。
斜阳欲照英雄志，却说闺帏诗尚存。

谒板仓杨氏故居

庐隐修篁似旧时，卅年身换恋花诗。
千言未了千千念，一子难留一一辞。
忍舍娇娆酬累卵，重书浪漫拜朱旗。
我来遇雨倾盆落，乌伞青山对望痴。

春 深

时晴时雨总潭州，绿渐招摇红渐羞。
一线遥青犹浣目，三巡大白又扶头。
春无定数柳风懒，世有天机蝶梦收。
燕子望花落惆怅，知他岂肯付江流。

天许（4首）

登杜甫江阁遇雨

高阁嵒峽俯大江，登临送目感浑茫。
飞云遥接洞庭野，急浪横穿楚国疆。
雨过天低愁似杜，时危民困岂唯唐。
汀洲鸥鹭来还去，不管凭栏客断肠。

重九购小黄菊

东篱早已意相侔，几朵携回满室幽。
如我性情难补世，觉卿姿态最宜秋。
衣分浅翠浮清气，梦染寒香念旧游。
唯惜无端连日雨，长筇不得倒林丘。

游小山寺

古寺云峰上，松门日半开。
粉墙新画佛，石径久生苔。
借座闻闲磬，无心乞妄财。
诸僧皆不语，知我看山来。

南岩宫玄帝殿避雨

但为酬佳兴，欲登观岭台。
阴晴本无定，谁料雨真来。
悬溜吹难断，连山望不开。
南岩宫观古，差可一徘徊。

陈海洋（4首）

游东华寺诵六祖惠能《菩提偈》有作

禅钟缥缈涤尘襟，默诵菩提鸟语侵。
行到月明天宇净，满山清气拂人心。

夜游南天湖

入得南湖碧水幽，天香十里正堪游。
春风作伴月光灿，来与梅花共白头。

山家野梅

朝霞晚露染衣襟，偶向春风识瑞禽。
莫道山人嘉客少，一枝清雅出云深。

农家过年

灯笼挂上竹篱笆，鸟语欣然满树丫。
一袖春风长在手，十分福气到人家。

谭获云（4首）

贺周雅琴巴黎奥运会平衡木比赛获银奖

相从木上见分明，花样缤纷瞬息成。
倒立如松千步稳，翻飞似燕一人轻。
舞随韵律多灵动，气定身姿自水平。
借得东风无限力，摘来皎月鉴峥嵘。

江南水乡

舟楫轻摇细雨天，瓦墙错落柳如烟。
酒旗远近同桥隔，巷陌纵横与水连。
惯对江南诗意引，每闻丝竹画图悬。
游来真个桃源至，抱得流光不羡仙。

题韶阳醇

杯中有物自真传，换骨移魂落座前。
技艺封神天下服，配方脱俗世间宣。
闻香恍惚通三界，入肚飘摇醉八仙。
尽得清甜纯净味，韶州白酒粤之巅。

题衡山五号山谷

为寻民宿作游仙，紫盖呼来一梦圆。
花向危崖房点豆，云封仄径水横天。
江山洗目长风引，松竹清心白日连。
美食凭君调口味，果真意趣是林泉。

文雯（3首）

参观迎宾路军史墙

恰似军人列一排，征魂浩浩绝尘埃。
红旗壁上如龙跃，曾挟天风海雨来。

秋 分

桂子芬芳透碧纱，满园秋色染轻霞。
初冷玉露疏疏处，独醉诗情是菊花。

龙城桂花

铺金点翠满秋光，别有清薰鸟语乡。
打破禅关才十里，千丝万朵压垣墙。

谢紫云（3首）

癸卯立冬

霎时雨骤霎时停，莫道无情却有情。
云外枫林红胜火，庭前樟树色尤青。
残荷影立霜华重，仄径谁登步履轻。
水瘦山寒人未老，黄花香淡晚风清。

甲辰元夕

冻雨凝冰柱，寒风向北枝。
梅开偏斗艳，酒淡不成诗。
寻梦天涯远，亏情月影迟。
孤吟青玉案，寂寂夜深时。

甲辰中伏酷热

花钱昼夜买清凉，银库亏空饮恨长。
收拾心情临圣教，抛开杂念惜时光。

书中文字读今古，梦里繁华远汉唐。
体健不求衣食贵，老来犹作少年狂。

王朝晖（4首）

题潭溪

应恐天清夜月低，隔枝忽听嫩莺啼。
心中虽有桃源景，更美家园此浅溪。

夏夜

天阴待理几盆花，煮水瞻云等月芽。
浑觉黄梅时节近，书窗亮处听鸣蛙。

傍晚散步

惜玉何如惜晚霞，老来难认格桑花。
田头静听香泥响，原是新荷露出芽。

采莲

一双野蝶绕荷塘，汗雨横飞落饭筐。
又是江南炎热季，余钱何处买清凉？

罗胜前（4首）

小满西湖即景

凤凰如火柳如烟，鹭自高飞鸥自眠。
宝塔巍峨思舍利，朝云寂寞忆苏仙。
遥闻塞北金铺地，喜见江南绿满天。
莫道虚盈无定数，三秋景象看当前。

祭端阳

年年五月祭端阳，凭吊声声屈子殇。
问候不能言快乐，逢人只许祝安康。
灵均固叹孤臣苦，绝地犹闻艾草香。
喜看龙舟雷鼓动，漫江胸胆尽开张。

送儿求学

仲夏天高日正长，男儿负笈越重洋。
家山在后身能靠，世界于前眼必张。
事问东西宜友善，情关对错握圆方。
风云万里轻挥手，静待归来共举觞。

到长沙

为向潇湘觅好诗，寅时起早尚嫌迟。
出门怕扰荆妻梦，去远方由晓色知。
借得罗浮灵秀气，来寻岳麓圣贤辞。
江边杜甫微微笑，一片丹心一念痴。